


TEZAU LITURGIC

27 AUGUST

ACATISTUL SF.CUVIOS-MUCENIC KUKȘA DE LA PECERSKA



MOSCOVA, 2000



АКАФИСТ

Священномученику КУКШЕ

КОНДАК

1

Избранному от обители Печерския, страны
вятичей просветителю, похвальное приносим
пение. Ты же, яко велий учителю наш и
заступниче, моли Христа Бога да избавит страну
нашу от бед и напастей, и утвердит ны в
Православии и вере, да любовью вопием ти:
Радуйся, священномучениче Иоанне Кукше,
просветителю страны нашея.

ИКОС

1

Ангелов Творец посла тя из обители Печерския в
страну нашу, да просветиши людие сидящая во
тьме и сени смертной, и наставиши заблудшия
во тьме язычества. Ты же пришел если к нам,
великий угодниче, верою Христовою, яко
камением многоценным, украшая страну нашу.
Темже просвещении верою и в ней
утверждении, любовью вопием ти сице:
Радуйся, светило пресветлое, лучами своими
осиявающее великую Россию;
Радуйся, честный воине Христа Бога, мрак
неверия усердно прогоняющий;
Радуйся, чудотворче предивный, твоими чудесы

всех удививый;
 Радуйся, столпе Церкви Христовой, на
 подкрепление нам от Бога уготованный;
 Радуйся, яко тобою научихомся поклоняться
 Творцу в Троице;
 Радуйся, священномучениче Иоанне Кукше,
 просветителю страны нашея.

КОНДАК

2

Видев Господь страну нашу во тьме сущую и
 языческою мглою погубляемую, посла тя,
 преподобне, из обители Печерския, да будеши
 людем наставник, учитель и пастырь, и всех
 приведеш к Богу, зовущих: Аллилуиа.

ИКОС

2

Разум богопросвещенный твой видящее жители
 страны нашея, вятичи именуемая, схождахуся к
 тебе и поучахуся словесем твоим и подвигом,
 крещение от тебе приемляху. Мы же от оных
 восприемше Веру православную, восхваляем тя
 вопиюще:

Радуйся, наставниче предивный, возведый нас к
 познанию Христа Бога;
 Радуйся, великий учителю, научивый люди
 страны нашея православной вере;
 Радуйся, пресветлый светильниче, тьму

неведения и злочестия разсеявый;
 Радуйся, пастырю добрый, приводяй словесное
 стадо к небесным пажитем;
 Радуйся твердый кормчий корабля Иисусова, от
 волн греха и страстей спасаей нас;
 Радуйся, священномучениче Иоанне Кукше,
 просветителю страны нашея.

КОНДАК

3

Сила Божия осени тя, отче Кукше, многими
 чудесы в стране нашей православив тя: бесы
 прогнал еси, дождь с небесе свел еси, озеро
 изсушил еси и иныя различныя дивныя чудеса
 сотворил еси. Темже людие, видевшее вся сия,
 воспеша прославльшему тя Богу: Аллилуиа.

ИКОС

3

Имея воистину, преподобне Кукше, великий дар
 чудотворений от Христа Бога к вечному
 спасению люди привел еси, велия чудеса и
 знамения творя, да вси узрят силу Божию, в
 немощи совершаемую, и оставльше тьму
 языческаго нечестия навьикнут славить тя сице:
 Радуйся, чудотворче изрядный, дарованный нам
 от Бога;
 Радуйся, попечителю о спасении душ
 человеческих, чудесами нас удивляй;

Радуйся, кормителю сирых, дождь с небесе
чудесно низведый;
Радуйся, спасителю дивный, молитвами твоими
бесы прогнавый;
Радуйся, помощниче труждающихся, силою
Божиею езеро изсушивый;
Радуйся, священномучениче Иоанне Кукше,
просветителю страны нашея.

КОДНАК

4

Бурею злобы и неистовства дышузе нечестивии
служителие бездушных идолов, воздвигоша
гонения на тя, преподобне отче, мнящее дело
твое уничтожити и веру Христову истребити. Ты
же и в страдании твоём воспел еси
дерзновенно Богу: Аллилуйа.

ИКОС

4

Слышавшее дерзновенную проповедь Евангелия
и видевшее богоугодное житие твое, невернии
людие мечем усекнуша тя с блаженным ти
учеником. Мы же, почитая твоя за Христа
страдания, просим твоея помощи и заступления:
утверди нас в вере, угодниче Христов, за
Возлюбившаго всех кровь свою проливый:
Радуйся, исповедниче православныя веры,
неверныя обличаяй;

Радуйся, пастырю добрый, душу свою
положивый за словесное стадо;
Радуйся, наше прибежище в годину скорби и
печали твоими страдания нас укрепляй;
Радуйся, честная главо, главу свою за веру
положивый;
Радуйся, священномучениче Иоанне Кукше,
просветителю страны нашея.

КОНДАК

5

Боготечная звезда явился еси, преподобне
Кукше, приводя к Горнему Иерусалиму всех ты
послакшающих. Твоими бо ученьми наставляеми
навыкохом воспеват и единому истинному Богу:
Аллилуиа.

ИКОС

5

Видевшее подвиги твоя в научении людей
истине Христовой, мнози последоваху стопам
твоим и тако скинии благодати умножахуся в
стране нашей, правоверныея людие тамо
воспевают ты сердца и усты:
Радуйся, храме Духа Святаго, всех верных
озаряй благодатию;
Радуйся, страны нашея украшение, души
верных веселящее;
Радуйся, звездо пресветлая, указующая всем

путь к Небесным обителем;
 Радуйся, апостолов достойный преемниче,
 своими труды обративый ко Христу люди
 заблудшия;
 Радуйся, мучеников честный подражателю,
 своею кровию запечатлевый проповедь
 Евангелия Христова;
 Радуйся, священномучениче Иоанне Кукше,
 просветителю страны нашея.

КОНДАК

6

Проповедник любви Христовы был еси,
 блаженнее Кукше, в сем житием твоим являя
 нам образ чистоты, смирения и кротости. Научи
 и нас сим добродетелем, преподобне да с тобою
 воспеваем возлюбшему тя Богу: Аллилуйя.

ИКОС

6

Возсия стране нашей свет богоугодного жития
 твоего, преподобне отче, сего ради подаеши
 молитвами твоими чтущим тя милости
 неизреченныя: болящим – исцеление,
 скорбящим – утешение, плачущим –
 радование, да вси людие прославляют тя,
 дивного во святых Божиих:
 Радуйся, путеводителю предивный, приводяй к
 свету неверныя;

Радуйся, тишину Христову паче всего мира возлюбивый;

Радуйся, утешителю печальных, в скорбех и бедах и напастех всем нам помогая;

Радуйся, врачу скорый и безмездный, туне исцеляй болезни душевные и телесные;

Радуйся, показавый нам образ любви, милосердия и всепрощения;

Радуйся, научаяй нас терпению, кротости и послушанию;

Радуйся, священномучениче Иоанне Кукше, просветителю страны нашея.

КОНДАК

7

Хотя люди страны нашея утвердить в православной вере и привести к вечному спасению, не убоился еси страданий и смерти за Христа Бога нашего, но взявши Крест Его, яко знамя победное, усердно взывал еси: Алилуиа.

ИКОС

7

Новую благодать Христа Спасителя нашего восприяша людие страны вятичей, егда возвестил еси им путь спасения, темже и прославиша тя, дивнаго во святых Божиих и возопиша ти таковая:

Радуйся, ревностный поборниче Православия, к

вере приводяй неверныя;
 Радуйся, неустрашимый воине Христа Бога,
 крестом побеждаяй враги спасения нашего;
 Радуйся, неизменный хранителю благодати и
 истины, Святым Крещением просветивый
 страну нашу;
 Радуйся, мудрый наставниче в неведении и
 заблуждении страждущих;
 Радуйся, нас любящих и чтущих тя спасаай
 твоими молитвами;
 Радуйся, священномучениче Иоанне Кукше,
 просветителю страны нашея.

КОНДАК

8

Странно и безумно показалось учение твое
 людем страны нашея, егда проповедал еси им
 Христа Бога, пострадавшего ради спасения
 людей на кресте и воскресшаго из мертвых.
 Слово бо кресное погибающим юродство, а
 спасаемым нам сила Божия есть, вопиющим:
 Аллилуиа.

ИКОС

8

Вся страна наша освятися подвиги и страдании
 твоими, страстотерпче Христов. Кто бо исчислит
 лишения и борения твоя, яже за Христа подъял
 еси, егда воста на тя жрецы бесовстии и

оклеветаша ты, предавшее мукам за имя
 Христово. Мы же, припадая к честному образу
 твоему, умиленно взываем ти:
 Радуйся, витие богопросвещенный, твоими
 словесы посрамивый языческая учения;
 Радуйся, ревностный проповедниче истины,
 идольскую лесть обличивый;
 Радуйся, твердый хранителю догматов и нам
 помогаяй противостояти еретическому
 суемудрию;
 Радуйся, пастырей Церкви подвизаяй на
 проповедание Слова Божия;
 Радуйся, верный путеводителю всех в Царство
 Света невечерняго;
 Радуйся, твоею кровию напоивый ниву
 Христову и возрадивый плоды добродетели;
 Радуйся, священномучениче Иоанне Кукше,
 просветителю страны нашея.

КОНДАК

9

Всякия напасти и скорби избави нас, угодниче
 Божий, се бо грех ради наших скорби и болезни
 обыдоша нас, несть мира в костех наших и
 исчезает дух терпения, кротости и всепрощения,
 да с любовью вопием Господу Спасителю
 нашему: Аллилуиа.

ИККОС**9**

Вития многовещанный показася блаженный
 Пимен, егда посреде церкви Печерския возопи
 велегласно: брат наш Кукша в сей день противу
 света убиен есть, и сия рекши, чистую душу
 свою Богу предаде, нас же научи пети тебе сие:
 Радуйся, звездо светлая, во тьме жизни нам
 светящая;

Радуйся, заре светозарная, прогоняющая тьму
 искушений и бед;

Радуйся, на заре возсияый твоими страданиями;

Радуйся, Пимена блаженного подвигнувый на
 проречение;

Радуйся, вкупе с ним возшедший во обители
 Отца Небеснаго;

Радуйся, помощниче наш в час смерти нашея;

Радуйся, священномучениче Иоанне Кукше,
 просветителю страны нашея.

КОНДАК**10**

Спасти хотя от прелести бесовския страну нашу,
 оставил еси святую обитель Печерскую,
 возложив все упование на Матерь Божию,
 несокрушимую стену и прибежище верных. По
 блаженней же кончине твоей возвратился еси
 паки во святую обитель, идеже мощи твоя сияют
 чудесы многими, подвизая верных воспевати
 Единому Богу: Аллилуиа.

10

Стену нерушимую обрел еси, преподобне,
Пречистую Матерь Божию, имея Ю заступницу
и дивную путеводительницу, прошел еси всю
страну нашу с проповедию Евангелия и по
смерти твоей возвратился еси во обитель
Печерскую, идеже и погребен был еси. Мы же,
поклоняющееся честным мощем твоим,
прославляем ты сице:
Радуйся, верный служителю Пресвятыя
Богородицы, помощию Ея укрепленный;
Радуйся, предивное украшение обители
Печерския, телом и духом в ней вечно пребывая;
Радуйся, радости монахов и утешение в мире
скорбящих;
Радуйся, заблудших и падших возвращай в
объятия Отча;
Радуйся, юным подавая смысл к учению слова
Божия;
Радуйся, и нас недостойных не оставляй твоими
молитвами; Радуйся, священномучениче Иоанне
Кукше, просветителю страны нашея.
Радуйся, священномучениче Иоанне Кукше,
просветителю страны нашея.

11

Пение усердное приносим тебе, великий
угодниче Христов, священномучениче Кукше,

просим и молим тя; прими наша недостойныя молитвы в похвалу тебе возносимыя и даждь нам силы, да последуем стопам твоим во исповедании Веры православныя и научи нас крепко, даже до смерти стояти за славу имени Божия и воспевати: Аллилуиа.

ИКОС

11

Светоприемная свеща истиннаго света явися нам память твоя, преподобне Кукше, сего ради прославляет тя страна наша, яко стродника нашего по плоти и единоплеменника. Ты же прими от нас, недостойных, песнь сию: Радуйся, града нашего честный покровителю и сродник твоих по плоти просветителю; Радуйся, учителю наш и заступниче, в годину скорби терпению нас научаяй; Радуйся, молитвенниче за немощных и падших, Христа Бога умилоствляй; Радуйся, щите твердый, имже мы защищаемся от нападений вражиих; Радуйся, всех объемляй твоею любовью; Радуйся, твоим честным образом присно с нами пребываяй; Радуйся, священномучениче Иоанне Кукше, просветителю страны нашея.

КОНДАК**12**

Благодати Божественныя сосуд был еси,
 преподобне, из негоже напаяеши всех нас
 учением, мудростию и добродетелию, да вси
 почитающии тя имут радость вечную в
 Царствии Христовом, идеже ты со Ангелы
 поеши: Аллилуиа.

ИКОС**12**

Поющее подвиги твоя и страдания, хвалим тя,
 преподобне отче Кукше и усердно вопием ти; о,
 великий наш учителю и наставниче в вере
 православной, прими, яко убогий дар, песнь
 сию, приносимую тебе:
 Радуйся, апостоле страны нашея, просветивый
 нас верою;
 Радуйся, добрый наш пастырю, защищай стадо
 твое от волков лютых;
 Радуйся, святителей Божиих бодрость и
 укрепление;
 Радуйся, иереев похвало и радование светлое;
 Радуйся, смиренных иноков вразумление и
 тихое веселие;
 Радуйся, путеводителю всех людей в Царство
 Истины и благ вечных;
 Радуйся, священномучениче Иоанне Кукше,
 просветителю страны нашея.

КОНДАК**13**

О, преславный угодниче Христов, священномучениче Кукше, прими малое сие моление наше и твоим мвятым предстательством избави нас от всяког зла, и в годину скорби даждь нам силу дерзновенно исповедати святую Православную веру, и в час кончины нашея буди нам помощник и утешитель, да поем прославльшему тя Богу: Аллилуиа. (трижды)

МОЛИТВА

О, святой страстотерпче, священномучениче Кукше, подвиги апостольския совершивый посреде обитания соплеменник твоих, отец наших, ихже ты светом истиннаго богопознания просвещал еси, и по даней ти благодати Духа Святаго бесы прогнавый, дождь с небесе сведый, езеро изсушивый и сотворивый ина многа чудеса, многострадальный же твой подвиг мученической кончиною увенчавый. Прими от нас усердные и умиленные молитвы и вознеси я ко Престолу Святыя Троицы, идеже ты в лице святых предстоиши, яко да твоим ходатайством милостивый Господь утвердит в мире и славе страну нау, в чадах же святых Православных Церкви да укрепит дух веры и благочестия, в пастырях ея да усугубит ревность к назиданию

пасомых и да призрит милостивым оком на люди предстоящая и прибегающая к твоей помощи.

Ей, святой угодниче Божий, всемы, яко велиих ради страданий твоих много может молитва твоя к Богу, сего ради и мы с верою припадающее к честным и многоцелебным мощем твоим, во святей твое иконе сущим, молим тя духом сокрушенным и смиренным сердцем: не презри молений наших изливаемых пред тобою, и вознеси я ко всещедрому Богу, яко кадило благовонное, да твоим ходатайством выну почиет благодать его во граде нашем и во святей обители сей, идеже чтится преславное имя твое, и люди страны нашея, да сохранятся от глада, огня, смертоносныя язвы и внезапныя смерти, от всяких бед и напастей. Споспешествуй, священномучениче Кукше, и нам грешным, zde предстоящим и молящимся рабам твоим, да охраняеми твоим предстательством, мирно и благочестно проживем в веце сем, славящее и благодарящее Единого Бога, восвятей Троице славимаго, Отца и Сына и Святаго Духа. Аминь.



ПОЛНЫЙ АКАФИСТНИК КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

I

НОВОЕ
* НЕБО